



Los ntawm Thawj Tswj Hwm Thomas S. Monson

Kev Hlub—lub Hauv Paus rau txoj Moo Zoo

Peb hlub tsis tau Vajtswv tas siab tas ntsws yog tias peb tsis hlub lwm cov neeg uas nyob hauv ntiyaj teb no nrog peb.

Kuv cov kwv tij thiab cov muam, thaum peb tus Cawm Seej tab tom qhuab qhia tib neeg, ib tug kws li choj noog Nws hais tias, “Xib Hwb, Vajtswv txoj cai nqe twg yog nqe tseem ceeb dua ntais huv tib si?”

Phau Mathais sau tias Yexus teb hais tias:

“Nej yuav tsum hlub tus Tswv nej tus Vajtswv kawg siab kawg ntsws, kawg plab kawg plawv.

“Nqe no thiaj yog lus txib uas tseem ceeb dua ntais.

“Thiab nqe ob uas tseem ceeb hais li no hais tias: Hlub koj tej kwv tij zej zog ib yam li koj hlub koj lub cev.”¹

Malakaus xaus zaj lus qhia txog tus Cawm Seej kab lus no hais tias: “Tsis muaj lwm nqi uas tseem ceeb tshaj ob nqis no.”²

Peb hlub tsis tau Vajtswv tas siab tas ntsws yog tias peb tsis hlub lwm cov neeg uas nyob hauv ntiyaj teb no nrog peb. Ib yam li ntawd, peb hlub tsis tau lwm cov neeg hauv ntiyaj teb no no tas siab tas ntsws yog tias peb tsis hlub Vajtswv, uas yog peb sawv daws Leej Txiv. Tus Thwj Tim

Yauhas qhia peb tias, “Tej lus uas Yexus Khetos qhia rau peb yog li no: Tus uas hlub Vajtswv, tus ntawd yuav tsum hlub nws kwv nws tij.”³ Peb sawv daws yog peb Leej Txiv Saum Ntuj Ceeb Tsheej cov me nyuam ntsuj plig, ces yog li ntawd, peb yog kwv tij nus muam. Thaum peb xav txog qhov tseeb no, ces txoj kev hlub tag nrho Vajtswv cov me nyuam txawm yog ib qho yooj yim ua.

Tiag tiag mas, kev hlub yog lub hauv paus rau txoj moo zoo, thiab Yexus Khetos yog peb tus Yam Ntxwv. Nws lub neej qhia txog txoj kev hlub tag nrho. Nws tau kho cov neeg uas muaj mob; Nws txhawb nqa cov uas poob siab; Nws cawm tau tus neeg uas ua txhaum kom dim. Thaum kawg cov neeg siab phem tau tua Nws pov tseg. Tiam sis tseem hnov cov lus los ntawm lub Rooj Khauj Khaum Taub Hau uas hais tias, “Txiv, thov koj zam txim rau lawv! Rau qhov lawv tsis paub hais tias lawv ua dab tsi”⁴—ib co lus zoo thaum tab tom tso lub neej no tseg uas qhia txog kev khuv leej thiab kev hlub tiag tiag.

Muaj ntau yam cwj pwm uas qhia txog kev hlub, zoo li kev ua siab zoo, ua siab ntev, tsis ua qias dub, kev to taub, thiab kev zam txim. Nyob ntawm peb txoj kev nrog lwm tus neeg sib raug zoo, tej yam no thiab lwm yam cwj pwm yuav pab txoj kev hlub loj hlob tuaj hauv peb lub siab.

Feem ntau peb txoj kev hlub yuav tshwm tuaj hauv peb txoj kev niaj hnuv nrog lwm tus neeg sib raug zoo. Qhov tseem ceeb yog qhov uas peb puas muaj cuab kav pom thaum ib tug neeg xav tau kev pab thiab ces mus pab lawv. Kuv ib txwm nyiam cov lus zoo hauv ib zaj paj huam me me uas hais tias:

*Kuv tau quaj hmo ntuj
Vim kuv tsis muaj peev xwm pom
Thaum lwm tus neeg xav tau
kev pab;
Tiam sis kuv yeej tsis tau
Khuv xim qhov uas
Kuv ua siab zoo rau lwm tus
neeg heev dhau.*⁵

Tsis ntev tas los lawm kuv kawm paub txog ib tug yam ntxwv txog txoj kev ua siab zoo hlub lwm tus neeg—uas pab ntau tshaj yus yuav xav. Yog thaum xyoo 1933, uas yog thaum muaj Kev Txom Nyem Ntau Kawg, ces tsis tshua muaj hauj lwm ua. Yog nyob rau tim sab hnuv tuaj hauv Teb Chaws Amelikas. Arlene Biesecker nyuam qhuav kawm ntawv high school tiav tas lawm. Tom qab nrhiav hauj lwm tau ntev lawm, nws txawm nrhiav tau ib txoj hauj lwm hauv ib lub tsev xaws khaub ncaws. Cov neeg ua hauj lwm ntawd tsuas tau nyiaj thaum xaws tau khaub ncaws raws

li lawv qhia xwb. Yog lawv xaws tau khaub ncaws ntau, ces lawv haj yam tau nyiaj.

Ib hnub tsis ntev tom qab nws pib hauj lwm, Arlene raug ib yam teeb meem uas ua rau nws ntxhov siab thiab npau taw tsim tsawv. Nws zaum ntawm lub tshuab xaws khaub ncaws sim tshem cov xov uas nws xaws yuam kev lawm. Zoo nkaus li tsis muaj neeg xav pab nws, vim tag nrho cov neeg xaws khaub ncaws ntawd tab tom ua ceev ceev kom lawv ua tau ntau cev. Arlene pib poob siab thiab tsis muaj chaw cia siab lawm. Nyob ntsiag tos ntawd, nws pib los kua muag.

Bernice Rock zaum ntawm Arlene ib sab. Nws ib nyuag laus zog thiab yeej txawj xaws khaub ncaws. Thaum nws pom hais tias Arlene nyuaj siab, ces Bernice tau tso nws txoj hauj lwm tseg thiab tau mus sawv ntawm Arlene ib sab, ua siab zoo qhuab qhia thiab pab nws. Nws pab Arlene mus txog thaum nws tso siab thiab txawj xaws cev khaub ncaws ntawd. Ces Bernice txawm rov qab mus zaum ntawm nws lub tshuab xaws khaub ncaws, pib ua hauj lwm txawm nws twb xiam sij hawm xaws khaub ncaws ntau, vim nws tau mus pab.

Vim hais tias ua siab zoo muab kev hlub me me li no, Bernice thiab Arlene txawm ua phooj ywg zoo rau tag nrho nkawd lub neej. Nkawd ob leeg tau yuav txiv thiab muaj me tub me nyuam. Ze li xyoo 1950 tawm, Bernice, uas yog ib tug mej zeej hauv lub Koom Txoos, tau muab ib Phau Ntawv Maumoos rau Arlene thiab nws tsev neeg. Thaum xyoo 1960, Arlene thiab nws tus txiv thiab cov me nyuam tau ua kev cai raus dej los ua mej zeej hauv lub Koom Txoos. Yav tom qab ntawd lawv raug muab khi ua ke hauv Vajtswv lub tuam tsev dawb huv.

Vim hais tias Bernice ua siab zoo li ntawd mus pab ib tug neeg uas nws tsis paub uas nyuaj siab thiab xav tau kev pab, neeg coob heev uas suav tsis txheeb, cov uas ciah thiab cov uas tuag tib si, nim no thiaj li tau

tej kab ke uas cawm tib neeg hauv txoj moo zoo.

Txhua txhua hnub hauv peb lub neej peb muaj tej lub cib fim muab kev hlub thiab ua siab zoo rau cov neeg uas nyob ntawm peb ib ncig. Thawj Tswj Hwm Spencer W. Kimball hais tias: “Peb yuav tsum nco ntsoov tias cov neeg uas peb ntsib hauv tej chaw nres tsheb, cov hoob kas, tej tsev, thiab hauv lwm qhov chaw yeej yog ib tug neeg ntawm tib neeg sawv daws uas Vajtswv muab rau peb kom hlub thiab pab. Yuav tsis pab peb li cas yog tias peb hais txog tib neeg sawv daws tiam sis peb tsis nco qab xav tias cov neeg uas nyob ntawm peb ib ncig yog peb cov kwv tij thiab cov muam.”⁶

Feem ntau peb tsis paub hais tias peb yuav muaj cib fim qhia peb txoj kev hlub. Ib qho piv txwv txog qhov no nyob hauv daim ntawv xov xwm thaum lub Kaum Hli Ntuj xyoo 1981. Kuv nyiam zaj no uas piav txog kev hlub thiab kev khuv leej kuv thiaj tau khaws zaj xov xwm no hauv kuv cov ntaub ntawv tau 30 xyoo tawm.

Zaj no qhia txog ib lub dav hlau Alaska Airlines uas yas ntawm Anchorage, Alaska, mus rau Seattle, Washington—lub dav hlau ntawd muaj 150 leej—es lub dav hlau tau pauv mus rau ib lub zos me me hauv Alaska vim lawv yuav tau mus tos ib tug me nyuam tub uas raug mob loj heev. Tus me nyuam tub uas muaj ob xyoos tau txiav ib txoj hlab ntshav liab ntawm nws txhais caj npab thaum nws ntog es ib daim iav ze nws tsev muab nws hlais. Lub zos no nyob li 450 mais (725 km) nram qab teb lub nroog Anchorage thiab yeej tsis nyob ntawm txoj kev uas lawv yuav yas mus. Tiam sis, cov neeg kho mob uas tab tom tu nws tau xa xov thov kev pab, thiab ces lawv tau pauv lub dav hlau kom mus tos tus me nyuam thiab coj nws mus rau lub nroog Seattle kom nws thiaj mus tau rau lub tsev kho mob.

Thaum lub dav hlau tsaws ntawm lub zos me me, cov neeg kho mob qhia tus kws tsav dav hlau tias tus

me nyuam tub los ntshav hlob heev es yuav tsis ciah mus txog Seattle. Ces lawv txawm txiav txim yas li 200 mais (320 km) mus rau lub nroog Juneau, Alaska, uas yog lub nroog ze tshaj plaws uas muaj ib lub tsev kho mob.

Tom qab xa tus me nyuam tub mus rau Juneau, ces lub dav hlau tau mus rau Seattle, nim no twb poob qab ob peb xuab moos lawm. Tsis muaj ib tug neeg twg uas yws yws, txawm tias lawv feem coob tau xiam sij hawm thiab tsis txog lwm lub dav hlau uas lawv yuav caij raws sij hawm li. Tiag tiag mas, thaum sij hawm dhau los mus, lawv tau pib sau nyiaj txiag ua ke, es khaws tau ntau yuav xa mus rau tus me nyuam tub thiab nws tsev neeg.

Thaum lub dav hlau yuav tsaws hauv Seattle, cov neeg ntawd pib qw nrov nrov muaj kev zoo siab thaum tus kws tsav dav hlau qhia tias nws tau xov xwm lawm hais tias tus me nyuam tub yuav nyob zoo.⁷

Kuv lub paj hlwb thiaj xav txog cov lus hauv phau vaj lug kub uas hais tias: “Txoj kev siab hlub yog txoj kev hlub dawb paug ntawm Khetos, . . . thiab tus uas raug nrhiav pom muaj nws nyob hauv hnub kawg, tus ntawd yuav tau zoo.”⁸

Kuv cov kwv tij cov muam, tej zaum tej lub cib fim zoo tshaj plaws rau peb qhia peb txoj kev hlub yuav yog nyob rau hauv peb vaj peb tsev. Txoj kev hlub yuav tsum nyob nruab plawv tsev neeg, thiab tej thaum tsis muaj li ntawd. Tej thaum muaj kev ua siab luv, sib cav sib ceg, sib ntaus, thiab kev quaj ntau dhau. Thawj Tswj Hwm Gordon B. Hinckley yws hais tias: “Vim li cas cov neeg uas peb hlub [tshaj plaws] yog cov uas feem ntau peb hais lus tsis zoo rau? Vim li cas tej thaum [peb] hais tej lus tsis zoo es cuag li peb siv riam nkaug tib neeg siab?”⁹ Tej zaum lo lus teb rau lo lus nug no nyias txawv nyias li, tiam sis txawm yog lus teb li cas los xij peem. Yog peb yuav khaws lo lus txib kom ib leeg hlub ib leeg, ces peb ib leeg yuav tsum ua siab zoo thiab saib taus ib leeg rau nqi.

Tej thaum yuav muaj sij hawm thaum yuav tsum muaj kev qhuab ntuas. Tiam sis, cia peb nco qab txog cov lus qhia hauv phau Lus Qhuab Qhia thiab Kev Khi Lus—uas hais tias, thaum twg peb yuav tsum cem lwm tus neeg, tom qab ntawd peb yuav tsum haj yam muab kev hlub.¹⁰

Kuv cia siab hais tias txhua lub sij hawm peb yuav sim ua siab zoo thiab txawj xav txog cov neeg uas nyob ntawm peb ncig. Cia peb tsis txhob thuam los sis tsim txom lwm tus. Tab sis mas, cia peb muaj kev khuv leej thiab txhawb pab lwm tus. Peb yuav tsum ua tib zoo kom tsis txhob ua rau lwm tus neeg xav tsis zoo txog lawv tus kheej vim peb hais tej lus los sis ua tej yam tsis zoo.

Kev zam txim yeej nyob nrog kev hlub. Nyob hauv peb tsev neeg, thiab thaum nyob nrog peb cov phooj ywg, tej tus yuav tu siab thiab kev tsis sib haum. Kuv hais ib zaug ntxiv, txawm yog muaj xwm dab tsi me npaum li cas los xij peem. Yuav tsum tsis txhob cia qhov teeb meem huam loj tuaj, vim ua li ntawd ces yuav ua rau tib neeg puas tsuaj mus xwb. Txoj kev liam txim tsuas pheej muab tej teeb meem ntawd qhib cia. Kev zam txim nkaus xwb thiab kho tau.

Muaj ib tug poj niam uas tau tso lub neej no tseg lawm thaum ub nws tuaj xyuas kuv thiab qhia kuv txog ob peb yam uas nws tu siab vim nws tau ua lawm. Nws tau piav txog ib qho uas kawj ntau xyoo tas los lawm nrog ib tug neeg zej zog uas ua teb, thaum ub nkawd yog phooj ywg zoo tiam sis nws thiab nws tus txiv muaj lus sib hais ob peb zaug. Muaj ib hnuv tus neeg ua teb no nug seb nws hla puas tau lawv thaj teb kom lug kev mus txog nws thaj teb. Ces thaum ntawd nws nres tsis qhia kuv zaj dab neeg, thiab pib quaj

quaj hais tias, “Tij Laug Monson, kuv tsis tau cia nws hla peb thaj av lub sij hawm ntawd thiab txhua lub sij hawm tom qab ntawd nws tau taug kev deb ncig thaj av thiaj mus txog nws thaj teb. Kuv twb ua yuam kev lawm, thiab kuv tu siab kawg. Tsam no nws tsis muaj sia nyob lawm, tiam sis, kheev lam kuv hais tau rau nws hais tias, ‘Kuv thov koj zam txim.’ Kheev lam kuv muaj dua lwm lub caij ua siab zoo rau nws.”

Thaum kuv mloog nws hais, kuv txawm nco qab txog John Greenleaf Whittier cov lus uas hais tias: “Hais txog tag nrho cov lus tsis zoo uas tib neeg hais los sis sau cia, cov no yog cov uas tu siab tshaj plaws uas hais tias: *Tej zaum yuav muaj li no.*”¹¹ Cov kwv tij thiab cov muam, thaum peb hlub thiab ua siab zoo ib leeg rau ib leeg, peb yuav tsis muaj tej kev tu siab li no.

Yus qhia tau kev hlub thaum ua tej yam li no: luag nyav, ntxuaj tes, hais ib lo lus zoo, hais lus zoo txog ib tug neeg. Lwm yam uas qhia tau txog kev hlub zoo li, nyiam tej yam uas lwm tus neeg xav ua, ua siab ntev thiab siab zoo thaum qhia ib txoj ntsiab cai, mus xyuas ib tug neeg uas muaj mob los sis tawm ntawm lawv lub tsev. Cov lus no thiab lwm yam yeej qhia tau txog peb txoj kev hlub.

Dale Carnegie, ib tug kws sau ntawv thiab hais lus hauv teb chaws Amelikas, ntseeg hais tias txhua tus neeg muaj hwj chim pab kom tib neeg ntiat teb yuav haj yam muaj kev zoo siab . . . thaum hais lus ris txiaj rau ib tug neeg uas kho siab los sis poob siab.” Nws hais ntxiv tias, “Tej zaum tag kis nej yuav tsis nco qab tej lus zoo uas koj tau hais hnuv no, tiam sis tus uas hnov cov lus zoo ntawd yuav muab khaws cia hauv tag nrho lawv lub neej.”¹²

Nim thov kom peb yuav pib ua hnuv no mus, cia li qhia kev hlub rau tag nrho Vajtsvov cov me nyuam, txawm yog rau cov neeg hauv peb tsev neeg, peb cov phooj ywg, cov neeg uas peb tsis paub zoo, los sis cov neeg qhuas los xij. Txhua tag kis thaum peb sawv los, cia peb txiav txim kom muaj kev hlub thiab ua siab zoo txawm peb raug xwm dab tsi los xij peem.

Kuv cov kwv tij thiab cov muam, peb yeej tsis to taub tias Vajtsvov hlub peb npaum li cas. Vim hlub peb npaum li no, Nws tau xa Nws Leej Tub los, es Nws hlub peb txaus Nws thiaj kam txo Nws txoj sia rau peb, xwv kom peb thiaj tau txoj sia nyob mus ib txhis. Thaum peb pib to taub qhov khoom plig zoo kawg nkaus no, peb lub siab lub ntsws yuav muaj kev hlub puv npo rau peb Leej Txiv uas Nyob Mus Ib Txhis, rau peb tus Cawm Seej, thiab rau tib neeg sawv daws. Kuv rau siab thov kom muaj li no los ntawm Yexus Khetos lub npe dawb ceev, amees.


LUS CIM

1. Mathais 22:36–39.
2. Malakaus 12:31.
3. 1 Yauhas 4:21.
4. Lukas 23:34.
5. Tsis paub tus kws sau, nyob hauv Richard L. Evans, “The Quality of Kindness,” *Improvement Era*, Tsib Hlis Ntuj 1960, 340.
6. *The Teachings of Spencer W. Kimball*, tus kho ntawv yog Edward L. Kimball (1982), 483.
7. Saib “Injured Boy Flown to Safety,” *Daily Sitka Sentinel* (Alaska), Kaum Hli Ntuj 22, 1981.
8. Maulaunais 7:47.
9. Gordon B. Hinckley, “Let Love Be the Lodestar of Your Life,” *Ensign*, Tsib Hlis Ntuj 1989, 67.
10. Saib Lus Qhuab Qhia thiab Kev Khi Lus 121:43.
11. “Maud Muller,” nyob hauv *The Complete Poetical Works of Yauhas Greenleaf Whittier* (1878), 206; ntxiv qhov uas ntawv qaij.
12. Dale Carnegie, hauv, qhov piv txwv, Larry Chang, *Wisdom for the Soul* (2006), 54.

Kev Qhia rau Peb lub Caij Nyoog

Txij thaum lub Tsib Hlis Ntuj xyoo 2014 mus txog lub Kaum Hli Ntuj xyoo 2014, yuav tsum npaj ib zaj los yog ob peb zaj lus hais los ntawm lub Plaub Hlis Ntuj xyoo 2014 lub tuam rooj sab laj kom qhia hauv pawg Pov Thawj Hwj Mekixedes thiab Koom Haum Niam Tsev tej kev sib ntsib thaum hnuv Sunday. Thaum Kaum Hli Ntuj xyoo 2014, xaiv tau tej zaj los ntawm lub Plaub Hlis Ntuj xyoo 2014 los sis Kaum Hlis Ntuj xyoo 2014 lub tuam rooj sab laj. Ceg txheem ntseeg thiab koog chaw cov thawj tswj hwm yuav tau xaiv tej zaj lus hais uas yuav siv nyob hauv lawv tej cheeb tsam, los yog lawv muab lub luag hauj lwm no so rau cov npisov los yog ceg ntseeg cov thawj tswj hwm xaiv los tau thiab.

Cov lus hais no muaj txawm peem ua ntau yam lus nyob rau ntawm conference.lds.org.



Los ntawm Thawj Tswj Hwm Henry B. Eyring
Tus Pab Cuam thib lb hauv Thawj Pawg Thawj Tswj Hwm

Ib qho Txiaj Ntsim Qub Txeeg Qub Teg ntawm Kev Cia Siab

Thaum nej txiaiv txim siab khi lus nrog Vajtswv los tsis khi, nej txiaiv txim siab saib nej puas yuav tseg ib qho txiaj ntsim qub txeeg qub teg ntawm kev cia siab rau lawv cov uas yuav ua raws li nej tus yam ntxwv.

Kuv cov kwv tij thiab cov muam, nej ib txhia yog caw tuaj koom lub rooj sab laj no los ntawm cov tub txib ntawm Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyooq Kawg. Tej zaum cov tub txib tau caw nej los khi lus nrog Vajtswv dhau los ntawm txoj kev ua kev cai raus dej.

Nej lwm tus neeg yog mloog vim nej tau txais lus caw ntawm ib tug neeg uas hlub nej xws li nej niam nej txiv, nej tus poj niam, los yog ib tug me nyuam. Tus ntawd tau caw nej vim nws cia siab tias nej yuav txiaiv txim siab muab cov kev khi lus uas nej twb khi nrog Vajtswv rov qab ua lub hauv paus ntawm nej lub neej. Hos nej ib txhia twb txiaiv txim siab rov qab los nrog tus Cawm Seej mus thiab hnub no nej zoo siab heev vim Nws txais tos nej.

Txawm tias nej yog leej twg thiab nyob qhov twg, nej tuav rawv qhov kev zoo siab ntawm coob tug neeg coob tshaj nej xav tau tawm tam sim no. Txhua hnub thiab txhua teev nej xaiv tau kom ceev nej txoj kev khi lus nrog Vajtswv.

Txawm tias nej nyob qhov twg rau ntawm txoj kev mus txais lub txiaj ntsim nyob mus ib txhis li, nej tuav rawv lub cib fim qhia coob tug neeg txoj kev mus txais kev zoo siab ntau dua. Thaum nej txiaiv txim siab khi lus nrog Vajtswv los tsis khi, nej txiaiv txim siab saib nej puas yuav tseg ib qho txiaj ntsim qub txeeg qub teg ntawm kev cia siab rau lawv cov uas yuav ua raws li nej tus yam ntxwv.

Nej thiab kuv tau koob hmoov vim muaj lus cog tseg hais txog ib qho txiaj ntsim qub txeeg qub teg li no. Txoj kev zoo siab uas kuv muaj hauv

kuv lub neej, kuv muaj vim yog ib tug neeg uas kuv twb tsis tau ntsib hauv kuv lub neej. Nws yog ib tug tub ntsuag uas tau rais los mus ua kuv ib tug yawg koob. Nws tseg ib qho txiaj ntsim qub txeeg qub teg ntawm kev cia siab rau kuv. Cia kuv qhia nej txog tej yam nws tau ua kom thiab npaj qhov txiaj ntsim ntawd rau kuv.

Nws lub npe hu ua Heinrich Eyring. Nws yug los es muaj nyiaj ntau. Nws txiv, Edward, muaj tej ntiag tug loj heev hauv Coburg, hauv lub teb chaws uas tam sim no hu ua Yelemas teb chaws. Nws niam yog tus poj nom Viscountess Charlotte Von Blomberg. Nws yawm txiv yog tus neeg saib xyuas tag nrho cov liaj teb rau teb chaws Prussia tus Vaj Ntxwv.

Heinrich yog Charlotte thiab Edward thawj tug tub. Charlotte tuag thaum nws muaj hnub nyoog 31 xyoos, tom qab nws tus me nyuam thib peb yug los. Edward tuag tsis ntev tom qab ntawd, tom qab nws ua tag nrho nws tej ntiag tug thiab nyiaj txiaj poob thaum nws tso nyiaj ua lag luam yuam kev. Nws tsuas muaj 40 xyoo xwb. Nws tseg peb tug me nyuam ntsuag.

Heinrich, kuv yawg koob, tau xiam nws niam thiab txiv, thiab tag nrho nws tej ntiag tug. Nws tsis muaj nyiaj hlo li. Nws sau tseg hauv nws zaj keeb kwm hais tias nws xav tias nws kawg kev lawm es tsuas cia siab tau rau teb chaws Amelikas xwb. Txawm tias nws tsis muaj kwv tij txheeb ze los yog phooj ywg nyob Amelikas teb, los nws yeej muaj kev cia siab txog qhov uas yuav mus Amelikas. Nws xub mus txog lub nroog New York City. Tom qab ntawd nws nyaib mus nyob St. Louis, Missouri.

Nyob St. Louis nws ib tug khub ua hauj lwm yog ib tug Neeg Ntseeg hauv Hnub Nyooog Kawg. Tus khub hauj lwm ntawd tau muab ib phau me nyuam ntawv uas yog Txwj Laug Parley P. Pratt. Nws nyeem thiab kawm txhua lo lus nws nrhiav tau hais txog Tsoom Haiv Neeg Ntseeg. Nws thov Vajtswv kom paub saib puas muaj tej tim tswv uas tau tshwm sim rau tib neeg pom tiag, saib puas muaj ib tug yaj saub uas muaj sia nyob tiag, thiab saib nws puas tau nrhiav ib txoj kev ntseeg uas muaj tseeb tiag.

Tom qab ob lub hli uas nws ua tib zoo kawm thiab thov Vajtswv, Heinrich ua npau suav pom tias nws yuav tsum ua kev cai raus dej. Txwj Laug William Brown, uas yog ib tug txiv neej uas kuv saib rau nqi yam dawb ceev li, yog tus uas tau muab kuv yawg koob ua kev cai raus dej. Heinrich yog ua kev cai raus dej hauv ib lub pas dej nag thaum lub Peb Hlis Ntuj 11, 1855, thaum 7:30 sawv ntxov.

Kuv ntseeg tias Heinrich Eyring paub thaum ntawd hais tias tej yam kuv qhia nej hnub no muaj tseeb tiag. Nws paub tias txoj kev zoo siab ntawm lub neej nyob mus ib txhis los ntawm tej kev sib khi tsev neeg ua ke kom nyob mus ib txhis li. Txawm hais tias nws nyuam qhuav nrhiav tau tus Tswv txoj kev zoo siab, nws paub hais tias nws qhov kev cia siab rau txoj kev xyiv fab uas nyob mus ib txhis nyob ntawm saib cov uas lawv nws qab puas xaiv los mus ua raws li nws tus yam ntxwv. Nws qhov kev cia siab rau txoj kev zoo siab nyob mus ib txhis nyob ntawm saib cov neeg uas tseem tsis tau yug los xaiv li cas.

Ua ib feem ntawm kuv tsev neeg txoj kev cia siab, kuv yawg koob tau tseg ib zaj keeb kwm rau nws cov xeeb leej xeeb ntxwv.

Hauv zaj keeb kwm ntawd kuv pom tau tias nws hlub peb cov uas ua neej nyob tom qab nws. Kuv pom tias nws cia siab tias nws cov xeeb leej xeeb ntxwv yuav xaiv ua raws li nws tus yam ntxwv thiab taug txoj kev rov qab mus cuag Vajtswv. Nws paub hais tias yuav tsis yog ib qho kev txiav

txim siab uas txiav txim siab xaiv ib zaug xwb, tiam sis ntau qhov kev txiav txim siab me me. Nyob hauv nws zaj keeb kwm nws hais tias:

“Txij thaum kuv xub hnov Txwj Laug Andrus hais lus . . . Kuv yeej los tau koom txoj kev sib ntsib ntawm Tsoom Haiv Neeg Ntseeg thiab tsuas yog tsawg tsawg zaus xwb uas kuv tsis mus, vim yog kuv lub luag hauj lwm mus koom.

“Kuv sau qhov no hauv kuv zaj keeb kwm kom kuv cov me nyuam thiaj yoog tau kuv tus yam ntxwv thiab tsis txhob tso tseg . . . lub luag hauj lwm tseem ceeb no [kom sau ua ke] nrog Tsoom Haiv Neeg Ntseeg.”¹

Heinrich paub hais tias hauv tej kev sib ntsib noj lub cim nco txog peb rov qab cog lus kom nco qab ntsoov tus Cawm Seej thiab muaj Nws tus Ntsuj Plig roos peb.

Twb yog tus Ntsuj Plig ntawd uas txhawb nqa nws thaum nws raug hu los mus ua tub txib tsis ntev tom qab nws ua kev cai raus dej. Nws ua ib tug yam ntxwv zoo thiab coj ruaj nrees thiab ua hauj lwm ua tub txib puv rau xyoo hauv tej teb chaws Is Dias nws mam li tag. Kom thiaj tso tawm ntawm nws txoj hauj lwm ua tub txib, nws taug kev los ntawm Oklahoma mus rau Salt Lake City, kev deb li 1,100 mais (1,700 km).

\$Tsis ntev tom qab ntawd tus yaj saub hais kom nws nyaib mus nyob lub xeev Utah qab teb. Thaum nws nyob ntawd nws rov qab raug hu los mus ua tub txib hauv nws lub teb chaws Yelemas. Ces muaj ib tug Thwj Tim ntawm tus Tswv Yexus Khetos uas tau caw nws mus pab txhim tsa tej koog zej zog Neeg Ntseeg hauv Mev Teb qaum teb. Es nyob ntawd nws raug hu los mus ua tub txib hauv lub nroog Mexico City. Nws saib tej kev hu los mus ua hauj lwm rau nqi heev. Nim no nws pw hauv ib lub toj ntxas hauv Colonia Juárez, Chihuahua, Mexico.

Kuv hais tej no tsis yog kuv yuav khav txog nws los yog tej yam nws tau ua rau nws cov xeeb leej xeeb ntxwv. Kuv tsuas hais kom hawm

nws vim yog nws tus yam ntxwv muaj siab ntseeg thiab kev cia siab.

Nws lees txais tej hauj lwm ntawd vim yog nws txoj kev ntseeg hais tias tus Khetos thiab peb Leej Txiv Saum Ntuj Ceeb Tsheej tau tshwm sim rau Yauxej Xamiv pom hauv ib koog ntoo hauv lub xeev New York. Nws lees txais tej hauj lwm ntawd vim nws muaj siab ntseeg hais tias tej yawm sij pov thawj hwj hauv tus Tswv lub Koom Txoos tau txum tim rov qab los es muaj lub hwj chim muab tsev neeg sib khi ua ke mus ib txhis li, yog tias lawv muaj siab ntseeg txaus ceef lawv tej kev khi lus.

Ib yam li kuv tus yawg koob Heinrich Eyring, tej zaum nej ib tug yog thawj tug hauv nej tsev neeg uas coj kev mus rau lub neej nyob mus ib txhis vim yog tej kev sib khi lus nrog Vajtswv thiab kev rau rau siab muaj siab ntseeg. Txhua txoj kev khi lus muaj tej kev lav ris ua thiab tej lus cog tseg. Rau peb txhua tus, ib yam li rau Heinrich, tej kev lav ris ntawd kuj zoo li yooj yim ua, tiam sis feem ntau nyuaj heev. Tiam sis nco qab ntsoov, tej kev lav ris no yuav tsum nyuaj me ntsis qee zaum vim lub ntsiab ntawm tej kev lav ris no yog kom peb taug tau txoj kev rov qab mus nrog peb Leej Txiv Saum Ntuj Ceeb Tsheej thiab Nws Tib Leeg Tub Yexus Khetos nyob ua ke nrog peb tsev neeg.

Nej nco qab tau cov lus los ntawm phau ntawv Anplaham uas hais tias:

Muaj ib tug nyob hauv lawv uas zoo ib yam li Vajtswv, thiab nws hais rau lawv cov uas nrog nws nyob ntawd hais tais: Peb yuav nqis mus, vim muaj chaw nyob ntawd, thiab peb yuav muab tej khoom no, thiab peb yuav tsim ib lub ntiaj teb rau cov neeg no tau nyob;

Thiab lawv yuav xyuas seb, cov neeg puas kam ua txhua yam uas tus Tswv lawv tus Vajtswv txib lawv ua;

Thiab lawv cov uas ceef lawv thawj qhov yeeb koob yuav tau yeeb koob ntxiv; thiab lawv cov uas tsis ceef lawv thawj qhov yeeb koob yuav tsis muaj yeeb koob nyob hauv tib lub nceeg vaj nrog lawv cov uas

ceev lawv thawj qhov yeeb koob; thiab lawv cov uas ceev lawv qhov yeeb koob thib ob yuav muaj yeeb koob ntxiv rau saum lawv tej taub hau kav mus ib txhis li.²

Txoj kev ceev peb qhov kev yeeb koob thib ob nyob ntawm saib peb puas kam nrog Vajtswv sib khi lus thiab ua raws li tej kev lav ris uas tej kev khi lus hais kom peb ua. Yuav tsum muaj siab ntseeg rau ntawm Yexus Khetos ua peb tus Cawm Seej kom thiaj ceev tau tej kev khi lus tas ib sim neej.

Vim Adas thiab Evas tau poob, peb thiaj muaj kev haub kev ntxias, kev sim siab, thiab kev tuag ua peb ntiag tug. Txawm yog li ntawd los, peb Leej Txiv Saum Ntuj Ceeb Tsheej tau muab Nws Leej Tub, Yexus Khetos, los mus ua peb tus Cawm Seej. Lub txiaj ntsim thiab txoj koob hmoov zoo kawg ntawm Yexus Khetos txoj Kev Theej Txhoj kuj yog peb ntiag tug thiab: txoj kev cog lus tias muaj Kev Sawv Ros thiab tias muaj lub cib fim nyob mus ib txhis li rau tag nrho lawv cov uas yug los.

Qhov koob hmoov zoo tshaj ntawm Vajtswv, txoj kev nyob mus ib txhis li, yuav los rau peb tsuas yog thaum peb khi tej kev khi lus uas muaj hauv Yexus Khetos lub Koom Txoos tseeb dhau ntawm Nws cov tub qhe uas muaj txoj cai. Vim yog txoj Kev Poob, peb sawv daws yuav tsum muaj tej kev ntxuav uas los ntawm txoj kev ua kev cai raus dej thiab kev tso tes saum taub hau kom thiaj txais lub txiaj ntsim Vaj Ntsuj Plig Dawb Huv. Tej kab ke no yuav tsum yog lawv cov uas tuav txoj cai ntawm lub pov thawj hwj thiaj ua xwb. Ces, vim yog tau kev pab ntawm tus Khetos txoj Kev Kaj thiab tus Vaj Ntsuj Plig Dawb Huv, peb ceev tau tag nrho tej kev khi lus uas peb khi nrog Vajtswv, twb yog cov kev khi lus uas peb khi hauv Nws tej tuam tsev. Tsuas yog ua li ntawd xwb, thiab tau kev pab ntawd, ib tug neeg twg thiaj lees txais tau nws qub txeeg qub teg ua Vajtswv ib tug me nyuam hauv ib tse neeg nyob mus ib txhis.

Rau nej ib txhia, tej zaum tej no yog ib zaj npau suav uas yuav muaj tsis tau tiag.

Nej tau pom tej niam txiv uas muaj siab ntseeg tiam sis uas tu siab vim yog lawv ib tug me nyuam xyeej los yog tsis kam ceev lawv tej kev khi lus nrog Vajtswv. Tiam sim cov niam txiv zoo li ntawd tso siab tau thiab cia siab tau vim yog tej yam uas tau muaj los rau lwm cov niam txiv.

Amas tus tub thiab Vaj Ntxwv Mauxiyas cov tub tau tig los rov qab los ntawm lawv txoj kev ntxeev tawm tsam cov kev khi lus thiab Vajtswv tej lus txib. Amas tus Hluas pom nws tus tub Khali-atoos hloov siab lees txim thiab tig los mus muaj siab ntseeg ua tej hauj lwm zoo. Phau Ntawv Maumoos kuj ceev tseg qhov txuj ci tseem ceeb ntawm cov Neeg Lamas uas tau muab lawv tej kev ntxub ntxaug tso pov tseg thiab khi lus tias lawv xum tas sim neej kom thiaj muaj kev thaj yeeb nyab xeeb.

Ib tug tim tswv saum ntuaj tau los rau tus tub hluas Amas thiab Mauxiyas cov tub tau pom. Tus tim tswv tau nqis los vim yog txoj kev ntseeg thiab txoj kev thov txog Vajtswv ntawm Vajtswv cov neeg. Los ntawm tej yam ntxwv ntawd uas qhia txog txoj kev Theej Txhoj hauv tib neeg lub neej, nej txais tau kev siab loj thiab kev nplij siab.

Tus Tswv tau muab kev cia siab rau peb sawv daws thaum peb rau rau siab pab lawv cov uas peb hlub lees txais lawv qhov qub txeeg qub teg nyob mus ib txhis. Tus Tswv tau cog lus tias peb yuav tau koob hmoov thaum peb rau rau siab sau tib neeg los cuag Nws, txawm tias lawv xyeej Nws txoj kev caw. Qhov uas lawv xyeej Nws ua rau Nws tu siab, tiam sis Nws tsis tso tseg li, es peb yuav tsum tsis txhob tso tseg thiab. Tus Tswv ua ib tug yam ntxwv zoo heev rau peb hais txog kev hlub tsis tso tseg li. Nws hais tias, “Thiab ntxiv, pes tsawg zaus uas ntshe kuv twb sau nej lawm ib yam li ib tug poj qaib sau nws tej me nyuam los nyob hauv nws qab tis, muaj tseeb tiag,

Au nej cov neeg ntawm tsev neeg Ixayees, cov uas tau vau; muaj tseeb tiag, Au nej cov neeg ntawm tsev neeg Ixayees, nej cov uas nyob hauv Yeluxalees, ib yam li nej cov uas tau vau; muaj tseeb tiag, pes tsawg zaus uas ntshe kuv twb sau nej lawm ib yam li ib tug poj qaib sau nws tej me nyuam, thiab nej tsis kam.”³

Peb tso siab tau hais tias tus Cawm Seej yeej los xav coj tag nrho Leej Txiv Saum Ntuj Ceeb Tsheej cov me nyuam rov qab los mus tsev nrog Nws. Txhua tus niam txiv, pog yawg, pog koob yawg koob yeej xav li ntawd ib yam. Leej Txiv Saum Ntuj Ceeb Tsheej thiab tus Cawm Seej yog ob tug yam ntxwv zoo tshaj plaws txog tej yam peb ua tau thiab yuav tsum ua. Nkawd yeej tsis yuam kom leej twg ua neeg ncaj ncees vim txoj kev ua ncaj ncees yuav tsum yog ib yam uas peb xaiv ua. Nkawd ua rau peb pom tau kev ncaj ncees, thiab Nkawd cia peb pom tias nws tej txiv yeej qab heev.

Txhua tus neeg uas yug los hauv lub ntiag teb no txais qhov Kaj ntawm Khetos, uas pab peb pom thiab hnob hauv nruab siab saib qhov twg thiaj yog thiab tsis yog. Vajtswv tau xa nws cov tub qhe los uas muaj peev xwm, dhau ntawm tus Vaj Ntsuj Plig Dawb Huv, pab peb pom tau saib Nws xav kom peb ua li cas thiab saib tej yam twg yog tej yam uas Nws txwv tsis pub peb ua. Vajtswv ua rau peb muaj siab xav ua neeg ncaj ncees vim ua li ntawd ua rau peb zoo siab. Yog tias peb xaiv qhov yog, peb yuav nrhiav tau kev zoo siab—raws li lub sij hawm yog. Yog tias peb xaiv qhov phem, yeej muaj kev tu siab thiab kev khuv xim—raws li lub sij hawm yog. Tej yam uas muaj los ntawd muaj tseeb tiag. Tiam sis feem ntau peb tsis pom qhov uas yuav muaj los ntawd sai. Qhov no yog Vajtswv txhob txwm ncuaj sij hawm. Yog tias tej koob hmoov yog los tam sid, ces qhov kev xaiv qhov yog yuav tsis pab peb txoj kev ntseeg hlo li. Thiab vim Vajtswv ncuaj sij hawm rau kev tu siab qee zaum, peb yuav tsum muaj siab ntseeg peb thiaj xav tias peb

yuav tsum hloov siab lees txim thaum ntxov es tsis tos rau lub sij hawm uas peb tu siab thiab mob siab tiag.

Leej Txiv Lihais tu siab heev vim yog nws ib co tub thiab lawv tsev neeg tej kev xaiv. Lihais yog ib tug neeg zoo—Vajtswv ib tug yaj saub. Feem ntau nws ua tim khawv txog peb tus Cawm Seej, Yexus Khetos, rau lawv. Nws yog ib tug yam ntxwv ntawm kev mloog lus thiab kev hawm tus Tswv thaum tus Tswv hais kom nws muab nws tej ntiag tug tso tseg thiab khiav mus kom thiaj dim kev puas tsuaj. Thaum nws yuav tas sim neej, nws tseem yeej meem ua tim khawv rau nws cov me nyuam. Ib yam li tus Cawm Seej—thiab txawm tias nws tsis muaj lub hwj chim pom tau lawv tej siab ntsws thiab saib yuav muaj li cas rau lawv—Lihais xyab tes rau lawv kom caw lawv los txais txoj kev cawm seej.

Niaj hnuv nim no coob tug ntawm Leej Txiv Lihais cov xeeb leej xeeb ntxwv muaj kev cia siab vim yog nws txoj kev cia siab rau lawv ua ntej.

Nej thiab kuv yuav kawm dab tsi los ntawm Lihais tus yam ntxwv? Nej kawm tau los ntawm nws tus yam ntxwv thaum nej rau rau siab kawm vaj lug kub thiab ua tib zoo saib txhua yam ib ncig nej.

Kuv xav tias tsim nyog nej saib qhov tom ntej mus deb thiab nyob ze huv tib si thaum nej sim muab ib lub txiaj ntsim qub txeeg qub teg rau nej tsev neeg. Hais txog qhov tom ntej nyob ze, yeej yuav muaj teeb meem thiab Ntxwg Nyoog yuav qw nth. Thiab yeej muaj tej yam uas yuav tsum ua tib zoo muaj siab ntseeg tos ntsoov, es paub tias tus Tswv yuav siv sij hawm ua tej yam uas Nws yuav ua, tiam sis Nws mam ua tiag.

Muaj tej yam uas nej ua tau thaum ntxov, thaum cov uas nej hluv tseem yau. Nco qab ntsoov tias kev thov Vajtswv ua ke ua ib tse neeg, kawm vaj lug kub ua ke, thiab ua tim khawv hauv txoj kev sib ntsib noj lub cim nco txog muaj feem ntau dua thaum cov me nyuam tseem yau. Cov me nyuam me hnov tau tus Ntsuj Plig ntau dua peb xav.

Thaum lawv loj hlob tuaj lawm, lawv yuav nco qab tau tej zaj nkauj uas lawv nrog nej hu. Ntau tshaj cov nkauj hu, lawv yuav nco qab txog cov lus vaj lug kub thiab cov lus tim khawv. Tus Vaj Ntsuj Plig Dawb Huv yuav coj tau tag nrho txhua yam rau lawv lub cim xeeb, tiam sis cov lus vaj lug kub thiab cov nkauj hu yuav kav ntev tshaj plaws. Tej yam uas lawv nco ntawd yuav rub tau lawv rov qab los thaum lawv ua loj leeb rau ib ntu, tej zaum ntau xyoo, es tsis taug txoj kev rov qab mus tsev nyob mus ib txhis.

Peb yuav tsum saib tau qhov tom ntej mus deb thaum lawv cov uas peb hluv mus ua raws li lub ntiag teb thiab zoo li ib txoj kev tsis ntseeg los kov yeej lawv txoj kev ntseeg. Peb yuav tsum muaj siab ntseeg, kev cia siab, thiab kev siab hluv kom coj peb kev thiab ntxiv dag zog rau lawv.

Kuv tau ua ib tug pab cuam rau Vajtswv ob tug pab cuam thiab kuv tau pom li ntawd. Ob tug yaj saub no nyias coj nyias cwj pwm. Tiam sis nkawd ob leeg yeej saib qhov tom ntej nrog kev cia siab ntau. Thaum leej twg yws yws txog ib yam uas muaj los hauv lub Koom Txoos, feem ntau ob tug yaj saub no yuav hais tias, “Auj, yeej yuav zoo thaum kawg.” Feem ntau nkawd paub txog qhov teeb meem thiab saib yuav tsum ua li cas kho ntau tshaj cov neeg yws yws.

Nkawd kuj paub txog tus Tswv txoj kev, thiab yeej los muaj kev cia siab txog Nws lub nceeg vaj. Nkawd paub tias tus Tswv yog tus coj. Nws muaj hwj chim thiab Nws hluv peb. Yog tias nej cia Nws coj nej tsev neeg, yeej yuav zoo thaum kawg.

Heinrich Eyring cov xeeb leej xeeb ntxwv ib txhia tau ua loj leeb thiab. Tiam sis yeej muaj nws ib co me nyuam xeeb leej xeeb ntxwv uas sawv ntxov mus tom Vajtswv tej tuam tsev kom thiaj ua tau kev cai raus dej tam cov poj koob yawm ntxwv uas lawv yeej tsis tau ntsib li. Lawv mus vim yog txoj kev cia siab uas nws tseg rau lawv. Nws tseg ib lub txiaj ntsim qub txeeg qub teg uas nws cov xeeb leej xeeb ntxwv tseem lees txais.

Tom qab peb ua txhua yam uas peb ua tau raws li txoj kev ntseeg, tus Tswv yuav txhawb nqa peb txoj kev cia siab rau peb tsev neeg ntau tshaj peb xav tau. Nws xav kom lawv thiab peb txais tej koob hmoov zoo tshaj plaws, vim peb yog Nws cov me nyuam.

Peb txhua tus yog Vajtswv uas muaj txoj sia nyob cov me nyuam. Yexus Khetos yog Nws Leej Tub thiab peb tus Cawm Seej uas sawv rov los. Nov yog Nws lub Koom Txoos. Nyob hauv lub Koom Txoos yog tej yawm sij ntawm lub pov thawj hwj, thiab yog vim li ntawd tsev neeg thiaj nyob tau ua ke mus ib txhis li. Nov yog peb qhov txiaj ntsim qub txeeg qub teg ntawm kev cia siab. Kuv ua tim khawv hais tias qhov no muaj tseeb los ntawm Yexus Khetos lub npe, amees.

LUS CIM

1. Saib Henry Eyring tej lus nco txog, 1896, typescript, Church History Library, 16–21.
2. Anplaham 3:24–26.
3. 3 Nifais 10:5.